

PROGRAMACIÓ



GOBIERNU DEL
PRINCIPAU D'ASTURIAS

DÍA DEL LLIBRU 23 D'ABRIL

SELMANA DEL 20 AL 24 D'ABRIL

◆ Biblioteca d'Asturies "Ramón Pérez de Ayala"

Mientras la selmana na que se celebra'l Día del Llibru, del 20 al 24 d'abril, la Biblioteca d'Asturies "Ramón Pérez de Ayala" preparó la publicación nel so perfil de Facebook d'una serie de vídeos nos que pueden vese dellos mensajes sobre'l confinamientu, les llectures, la llingua asturiana, el papel de les biblioteques o los fondos especiales de la Biblioteca. Estos vídeos son:

Día 20: Llamamientu a "Quédate en casa" pa llueu "Volver a la biblioteca".

Día 21: Llectura del poema *Una foguera mui vieya*, de Cuno Corquera.

Día 22: Presentación del manuscritu autógrafu de Bernardo Acevedo y Huelves *El bable*, datáu hacia 1890 y que se publicó en "El Almanaque Asturiano de El Carbayón".

Día 23: Llectura d'unos párrafos de Ben White, xefe de Propiedá Intelectual de la British Library, sobre'l papel de les biblioteques.

Día 24: Presentación, coincidiendo col centenariu del nacimientu d'Orlando Pelayo, d'una de les adquisiciones últimes de la Biblioteca: una edición bilingüe del *Llanto por Ignacio Sánchez Mejías*, publicada en Marsella en 1985, con grabaos del artista asturianu.

Más información: <https://www.facebook.com/bibliotecadeasturias/>

23 D'ABRIL

◆ Muséu de Belles Artes d'Asturies

Les redes sociales del Muséu de Belles Artes dedíquense el 23 d'abril al Día del Llibru. Col hashtag #quedARTEencasa van realizase delles propuestes nel marcu d'esta celebración:

- **Divulgación de los sos fondos**

Como vien haciendo desque empezó'l confinamientu, el Muséu de Belles Artes d'Asturies tamién va ofrecer conteníu de los sos fondos el Día del Llibru cola particularidá de qu'esi día va amosar dalguna sorpresa del so fondu bibliográficu na que la esplicación y imáxenes van abrir les puertes non solo de la pinacoteca, como vien siendo habitual, sinón tamién de la so fantástica biblioteca.

- **Recomendación de llibros**

La Biblioteca del Muséu únese anguaño una vegada más al BOOKCROSSING que, entamáu por Artium y nel que participen les biblioteques de museos de los principales museos españoles, tien por oxetu lliberar llibros. Nesta ocasión, y énte la imposibilidad de facelo na cai, va facese na rede ufiertando la posibilidá de conocer y descargar publicaciones d'otros centros.

- **Concursu**

Cola intención de facer participativu'l Día del Llibru, el Muséu de Belles Artes d'Asturies va proponer una serie d'obres gráfiques nos sos perfiles sociales, pertenecientes toes elles a llibros conservaos na so biblioteca y realizaes por artistes destacaos, cola mira de que'l públicu descubra y revele la so autoría. Van sortiaes delles publicaciones ente les y los participantes.

Más información: www.museobbaa.com

◆ Centru del Prerrománicu Asturianu

Presentación del cuentu *La dinastía de Pelayo* de Gara Lafuente

Cuentacuentos con actividá descargable

Esta ye la hestoria real d'una neña famosa pola so guapura, que tresmitió los derechos a la corona, y d'un neñu que dexó ablucau al emperador Carlomagno coles sos novedoses idees y obres, que güei son Patrimoniu de la Humanidá. Ye un cuentu nuna época alloñada (ss. VIII y IX), onde'l nostru xoven protagonista empecipió'l prerrománicu, construyó la famosa Cruz de los Ánxeles, creó'l Camín de Santiago y fundó l'actual Catedral de Compostela.

Esti proyectu de los cuentos históricos foi escoyíu pola Cámara de Comerciú de Santa Cruz de Tenerife como ún de los 8 productos entamadores p'apoyar anguaño, nun programa financiáu por Mapfre, Caja7, Seur, y otros entidaes.

Más información: www.centroprerromanicocasturiano.com

◆ Centru d'Arte Rupestre “Tito Bustillo”

Presentación del llibru *La Cueva de les Pedroses. La investigación y los nuevos hallazgos* d'Alberto Martínez-Villa

Alberto Martínez-Villa, director de les investigaciones y autor del llibru Arte y ocupación prehistórica en la Cueva de Les Pedroses va presentanos los afayos nuevos na Cueva de les Pedroses y va amosanos imáxenes d'esta cavidá al traviés d'una pieza audiovisual.

Más información: www.centrotitobustillo.com

◆ Muséu del Xurásicu d'Asturies (MUSA)

Con cuenta de la celebración del Día del Llibru, el MUSA propón y recomienda una escoyeta de llibros pa toles edaes que nun pueden faltar ente les vuestres llectures. Una oportunidá p'averar el mundu de los dinosaurios, la ciencia en xeneral y la paleontoloxía en particular a toles persones interesaes. Tamién va poder descargase y imprimise un marcapáxines xurásicu.

Más información: www.museojurasicocasturias.com

◆ Centru Cultural Internacional Niemeyer

- Emisión de videu resume colos principales llibros que los nuestros invitaos y invitaes al Ciclu Palabra nos recomendaron mientres estos cuatro años últimos. Nel van figurar nomes como Carlos Ruiz Zafón, Juan Luis Arsuaga, Forges, Siri Hustvedt, Juan José Millás, Boris Izaguirre...
- Emisión de dellos vídeos nos que les y los comisarios (y otros personalidaes relacionaes col Centru Niemeyer) van recomendar los sos llibros favoritos nes sos árees d'actuación: fotografía nel casu de Rosa Olivares, teatru nel d'Antonio Ripoll, etc.
- osibilidad d'esfrutar n'abierto de los conteníos lliterarios xeneraos pol Centru Niemeyer a lo llargo de los años últimos al traviés de les grabaciones completes de los actos del Ciclu Palabra.
- Estes acciones van desenvolvese nes redes sociales del Centru Niemeyer: Facebook, Twitter, Instagram y Youtube.

Más información: www.centroniemeyer.es

◆ Llaboral Centru d'Arte y Creación Industrial

Cuentacuentos de Minerva Álvarez Barragán, d'Hipnótica Teatro

De los llargos viaxes na so escoba per tolos continentes, Minerflu, La Bruxa Maga, escoyó dos cuentos formosos, colos que vais poder suañar y imaxinar, esfrutando de las enormes selves enllenes d'animales exóticos y cielos inmensos por esplorar.

El Cuarentecuentos tien una duración de 16 minutos y ta dirixíu a persones a partir de los 3 años d'edá. Va poder vese na páxina de Facebook y nel canal del Youtube de Llaboral Centru d'Arte y Creación Industrial a partir del día 23 d'abril.

Más información: www.laboralcentrodearte.org

25 D'ABRIL

◆ Parque de la Prehistoria

Día del Llibru pa peques

El Parque de la Prehistoria de Teberga propón realizar "en casa" una de les sos actividaes habituales. Una llectura compartida al traviés d'un creativu lapbook mediante'l que descubrir les etapes de la Prehistoria y les característiques más destacaes de caúna d'elles ¿Quién yeren? ¿Cómo vivien? ¿Cómo yera la so vida cotidiana? ¿Qué pintaben, ónde y por qué?.

El Parque va recomendar amás delles llectures relacionaes cola Prehistoria y dirixies al públicu infantil.

Más información: www.parquedelaprehistoria.es

◆ Llaboral Ciudá de la Cultura

La programación *Vamos! a imaginar desde casa* el sábadu 25 d'abril va centrarse nel mundu de la lliteratura. Trés propuestes *online* y en directo que pretendan espertar la creatividá y imaxinación de les y los más pequeños y qu'apuesten por fomentar el so interés sobre la llectura.

12:30 h Club de llectura de la Llaboral. Con Ana Lamela

Descripción: Nel Club de llectura de la Llaboral fomentamos l'amor polos llibros y la llectura. Falamos d'escritores y poetas, cantamos y cuntamos cuentos. ¡Xúnete a nosotros/es nesta celebración *online* del Día del llibru!.

Perfil: Facebook <https://www.facebook.com/ana.lamela>

Edades: desde los 6 años.

Materiales: además vas necesitar ganas de pasar un tiempo entre lecturas y cuentos.

16:30 h *Scratch art: hacemos el nuestro marcapáxines*. Con Educo

Descripción: En línea con Día del Libro, vamos hacer un marcapáxines bien creativo con una técnica de pintura llamada *esgrafiado*, pero que al xunila al arte denomínase "Scratch art". Pueden ayudanos les nuestros families y así toos/es vamos poder disfrutar de la lectura en cualquier momentu..

Perfil: Instagram @educoasturias

Edades: desde los 5 años.

Materiales: Un foliu, un pedazu pequeñu de cartulina, pintures crayón (y si ye posible ceres tipu Manley), un paliyu o tenedor, un trozu pequeñu llana/llazu/filu grueso pa decorar, pegamentu de barra y tixeres.

17:15 h *¿Apetézte un kamishibai?* Con Goli Goli Teatro

Descripción: Aprovechando la celebración del Día del Libro, vamos hacer unos kamishibais y cuntar un par de cuentos, pa rematar depués con una pequeña actividá de papiroflexia.

Perfil: Facebook <https://www.facebook.com/goligoliteatro>

Edades: desde los 5 años.

Materiales: Un papel cortáu en forma de cuadráu.

Más información: www.laboralciudaddelacultura.com

◆ Centru d'Arte Rupestre "Tito Bustillo"

En busca del cuentu perdíu

Llei los relatos ganadores de la edición última del concursu escolar del Centru d'Arte Rupestre "Tito Bustillo" y esfruta'l sábadu 25 d'abril d'una sesión de cuentacuentos cola interpretación e ilustración d'unu d'ellos *Tras el terremoto*.

- Descargar *Las aventuras de Tito Bustillo*, relatu d'un alumnu del Colexu Públicu "Manuel Fernández Juncos" de Ribadesella/Ribese- ya, ganador en la 1.ª categoría (2.u y 3.u de Primaria).
- Descargar *Quién se lo iba a imaginar*, relatu d'un alumnu del Colexu Públicu "Peña Tú" de Llanes, ganador en la 2.ª categoría (4.u, 5.u y 6.u de Primaria).
- Descargar *Tras el terremoto*, relatu d'una alumna del IES de Noreña, ganadora en la 3.ª categoría (1.u y 2.u de la ESO).

Más información: www.centrotitobustillo.com

II CERTAMEN DE HAIKUS VISUALES

BASES DE LA CONVOCATORIA

LLABoral Centru d'Arte y Creación Industrial convoca'l II Certame de Poesía: Haikus Visuales, nel marcu del so programa públicu y de mediación, según estes bases:

1. Esti certame quier festexar el Día del Llibru y facer confluyir, una vez más, llinguaxes artísticos estremaos: poesía y creación audiovisual.
2. Los haikus presentaos tienen que cumplir estos requisitos:
 - La poética del haiku básase nel plasmu y la emoción que produz nel/na poeta la contemplación énte la realidá. D'esta vuelta, los haikus tienen que versar sobre'l confinamientu deriváu del estáu d'alarma que sufre'l nuestro país pola mor de la pandemia xenerada pol COVID-19.
 - Tienen que caltener la métrica clásica de 17 sílabes.
 - Los versos nun tienen que rimar.
 - La duración del videu nun va poder ser superior a 30".
 - Nel videu tien qu'apaecer el testu del haiku escritu o recitáu.
3. Va poder concursar cualquier persona que quiera, ensin tope d'edá. Toles persones participantes que nun algamaren la mayoría d'edá han rellenar l'autorización qu'acompaña estes bases.
4. Ha unviase un solu haiku visual por participante.
5. El videu ha unviase en mp4 con códec h264, estereu, con unes dimensiones de 1920x1080 píxeles y ha dir acompañáu d'un archivu axuntu colos datos personales de l'autoría: nome completu, dirección postal, correu electrónicu, teléfonu, edá, DNI.
6. Los haikus han ser inéditos, escritos n'español o en llingua asturiana, y non premiaos n'otros certámenes.
7. Tampoco nun se van almitir haikus que se publicaren primero en formatu electrónicu.
8. Los haikus han presentase firmaos col nome del autor o autora. Nun se van almitir pseudónimos.
9. El plazu de presentación d'orixinales a concursu va empezar el día 23 d'abril y va acabar el 15 de mayu del 2020. Fuera del plazu mentáu van poder seguir unviándose haikus, que van publicase nes redes sociales.
10. El xuráu va tar formáu por miembros del campu de la cultura, y un secretariu o secretaria, con voz pero ensin votu, como representante de LLABoral. La so composición va facese pública coincidiendo cola difusión del so fallu. El xuráu, que va actuar con llibertá y que les sos decisiones son inapelables, va discutir y emitir el fallu. Asina mesmo va poder otorgar el premiu a una sola obra, declaralu ex-aequo, con finalistes, o ermu. En tou casu, ente les y los componentes del xuráu van atopase representantes de LLABoral y representantes del mundu lliterariu.
11. El premiu va tar dotáu con 250 euros, un llote de publicaciones de LLABoral Centru d'Arte y Creación Industrial y un carné d'Amigu de númberu de LLABoral pal añu 2021.
12. Entiéndese que l'autor/a cede los derechos de reproducción de la obra ganadora a LLABoral.
13. Toles persones participantes ceden el derechu pa la publicación del so haiku nes redes sociales de LLABoral. LLABoral comprométese a publicar los haikus con indicación de la so autoría.
14. El fallu del xuráu va ser inapelable y va facese públicu depués de la so celebración, siendo comunicáu personalmente al autor/a primero de difundilo nos medios.
15. El fechu de participar nesti premiu supón l'acceptación dafechu de les sos bases.

Les señes d'unviu son estes: educacion@laboralcentrodearte.org

(Toa comunicación sobre'l certame va facese al traviés de la dirección de correu electrónicu indicada nes bases: educacion@laboralcentrodearte.org)

Iniciu: 23 d'abril del 2020

Finalización: 15 de mayu del 2020

Unvios: educacion@laboralcentrodearte.org

Referencia: Damos como referencia esti videu onde podéis ver los resultaos del I Certame de Haikus (que facía alusión a la esposición Nueches Eléctriques y que se llamó Haikus eléctricos. Finalistes y ganadores: [https:// www.youtube.-com/watch?v=jAJEWfq2F_0](https://www.youtube.com/watch?v=jAJEWfq2F_0)

Proyectu d'adaptación de los haikus ganadores y los cinco finalistes del concursu convocáu por LLABoral Centru d'Arte y Creación Industrial y El Gaviero Ediciones.

5 TARXETES-REGALU DE 30 EUROS PA COMPRA DE LLIBROS COL CARNÉ MOZU

Organización del sortéu

El Carné Mozu Européu del Principáu d'Asturies (Institutu Asturianu de la Mocedá), dientro de les sos actividaes de divulgación, súmase a la celebración del DÍA DEL LLIBRU entamando un sortéu de CINCO TARXETES-REGALU, cauna d'elles por valor 30 €. La tarxeta-regalu va destinase a la compra de libros pudiendo escoyer cada persona ganadora ente llibros dixitales o llibros editaos en papel. Nesti últimu casu, la compra ha realizase nuna de les empreses collaboradores del Carné Mozu escoyida pola ganadora o'l ganador.

Plazu de participación y fecha del sortéu

El plazu de participación va empezar el día 15 d'abril del 2020 y va acabar el día 23 d'abril del 2020, a les 9:00 hores. El sortéu va realizase'l día 23 d'abril del 2020.

¿Quién van resultar ganadores?

Van poder participar namás aquelles persones que seyan titulares del Carné Mozu Européu del Principáu d'Asturies y que rellenen correctamente los datos riquíos. Ente toos ellos va facese un sortéu al traviés de la plataforma d'Easy-promos de la que van salir de forma aleatoria 5 ganadores y 6 suplentes.

Nenguna persona va poder recibir, nos sorteos entamaos pol Carné Mozu del Principáu d'Asturies, más de dos premios a lo llargo de tol añu 2020. Si una persona resultare ganadora de más, va nomase ganadora a la persona suplente por orde rigorusu del sortéu

Requisitos de participación

Edá mínima de participación: va poder participar les y los mayores de 18 años y les y los menores, ente 14 y 18 años, namás lo van poder facer cola autorización de los padres/representantes llegalos.

El sortéu va realizase al traviés de Facebook y Instagram y, pa participar nél, les persones titulares del Carné Mozu han:

- mentar dos amig@s
- mentar dalgún de los/les sos autores y de los sos llibros favoritos

El nome de les persones ganadores va publicase na páxina de Facebook y Instagram del Carné lo más aína posible, dientro de los 4 díes siguientes a la realización del sortéu. Quien resulte premiáu va tener que se poner en contactu col Carné Mozu del Principáu d'Asturies al traviés d'esti corréu electrónicu: concursoscarnejoven@asturias.org nun plazu de 4 díes naturales pa comprobar que tien el so carné mozu vixente.

Quien nun resulten premios o premiaes nun van tener derechu a nengún obsequiu/premiu.

La participación nesta promoción implica l'acceptación de toos y caún de los términos y condiciones incluyíos nestes bases.

Escepcionalmente, y por motivos bien xustificaos, van poder modificase estes bases desque empieza la promoción, incluyendo la cancelación o suspensión antemanada del concursu.

Los datos de calter personal que nos proporcionen van incorporase a les nuesres bases de datos cola finalidá de xestionar la so participación nesta promoción nos términos establecíos n'apartáu correspondiente a la política de privacidad que figura nestes bases.

Condiciones del premiu

Del sortéu van salir 5 ganadores que van consiguir, caún d'ellos, UNA TARXETA-REGALU por valor de 30 €. La tarxeta-regalu va destinase a la compra de llibros, pudiendo escoyer cada ganador o ganadora ente llibros dixitales o llibros editaos en papel. Nesti últimu casu, la compra va realizase nuna de les empreses collaboradores del Carné Mozu escoyida pol ganador o ganadora. La compra va realizase pol Programa Carné Mozu Européu.

Dende'l Carné Mozu van ponese en contactu cola persona ganadora p'alcordar la entrega del premiu.

El premiu nun va poder cambiase pol so preciu en metálico.

Política de privacidad

El programa Carné Mozu del Principáu d'Asturies respeta la llexislación vixente en materia de protección de datos personales, la privacidad de los intereses y el secretu y seguranza de los datos personales, d'al cuerdu colo establecío na llexislación aplicable en materia de protección de datos, en concreto, el Reglamentu (UE) 2016/679 del Parllamentu Européu y del Conseyu de 27 d'abril del 2016, adoptando pa eso les midíes técniques y organizatives necesaries pa evitar la pérdiga, mal usu, alteración, accesu non autorizáu y robu de los datos personales facilitaos, teniendo en cuenta l'estáu de la tecnoloxía, la naturaleza de los datos y los riesgos a los que tán espuestos. Los datos apurríos pola persona interesada van usase, con calter únicu y esclusivu, pa xestionar la so participación nesta promoción. En nengún casu esos datos van ser oxetu de tratamientu o de cesión a terceros, si nun ye col preste inequívocu de la persona interesada, o nos términos establecíos na Llei 3/2018, de 5 d'avientu de Protección de Datos Personales y garantía de los derechos dixitales.

Responsable del tratamientu

Los datos de calter personal que se pudieren recoyer directamente de la persona interesada van tratase de forma confidencial y van quedar incorpora- os al tratamientu de datos del programa del Carné Mozu d'Asturies titularidá de l'Alministración del Principáu d'Asturies al traviés de la Dirección Xeneral del Institutu Asturianu de la Muyer y Polítiques de Moicedá, dependiente de la Consejería de Presidencia y Participación Ciudadana, Edificiu Buenavista. Plaza de la Paz, n.u 9, 1.u, 33006 Oviedo/Uviéu, Teléfonu: 985 108 350, Fax: 985 108 351, Corréu electrónicu: carnejoven@asturias.org

Derechos de les y los interesaos

Cualquier persona tien derechu a obtener confirmación sobre los tratamientos que de los sos datos se lleven a cabu pol Programa Carné Mozu del Principáu d'Asturies. Pue exercer los sos derechos d'accesu, rectificación, supresión y portabilidá de los sos datos, de llimitación y oposición al so tratamientu, amás d'a nun ser oxetu de decisiones basaes namás nel tratamientu automatizáu de los sos datos, cuando procedan, al traviés del Serviciu d'Atención Ciudadana (SAC) de l'Alministración del Principáu d'Asturies, presentando'l formulariu normalizáu, disponible en <https://sede.asturias.es>, que va poder localizar introduciendo'l códigu 201200088 nel buscador de la cabecera (asitiáu na parte cimera derecha de la páxina), electrónicamente o presencialmente al traviés del Rexistru Xeneral Central de l'Alministración del Principáu d'Asturies o per cualquiera de los medios establecíos na Llei de Procedimientu Alministrativu. Ensin perxuiciu de cualquier otru recursu alministrativu o acción xudicial, toa persona interesada va tener derechu a presentar una reclamación énte una Autoridá de Control en materia de Protección de Datos competente si-y abulta que'l tratamientu de datos personales que-y concierne infrinxe la normativa en materia de Protección de datos personales.